

# **SASARAN DAKWAH PADA MASA NABI S.A.W: KAJIAN KHUSUS TENTANG KEADAAN KEMASYARAKATAN ORANG ARAB JAHILIAH**

oleh

Prof. Madya Dr. Ab. Aziz bin Mohd. Zin

## **Abstract**

*This article tries to expose the social system and daily customary rules among the Arab Jahiliyah, which is the first focus of the da'wah by the Prophet Muhammad s.a.w. It shows their inferior way of life which need to be changed immediately.*

## **Pendahuluan**

Kajian untuk mengenalpasti bagaimanakah keadaan masyarakat Arab jahiliah, terutamanya untuk tujuan memahami al-Quran dan hadis dan metod kedua-duanya dalam dakwah sangat diperlukan. Tanpa memahami terlebih dahulu latar belakang masyarakat sasaran semasa al-Quran diturunkan dan hadis diucapkan, seseorang tidak dapat memahami kedua-duanya dengan baik, apalagi untuk dijadikan kedua-duanya panduan dalam dakwah. Walaupun dari sudut masa terlalu jauh jaraknya antara masyarakat dahulu dengan masyarakat sekarang, namun dari segi perwatakan manusia tidak jauh bezanya antara kedua-dua masyarakat tersebut. Dengan itu, kefahaman terhadap masyarakat Arab jahiliah masih diperlukan dalam dakwah.

Untuk memahami keadaan sebenar masyarakat Arab jahiliah dari sudut kemasyarakatan, kajian dilihat dalam sudut-sudut berikut.

### **1. Susun Lapis Masyarakat**

Orang Arab jahiliah terdiri daripada beberapa susun lapis, iaitu berdasarkan penglihatan dari sudut-sudut tertentu.

Dalam hal ini, Dr. Mustafa Abu Daif membahagikannya kepada empat, iaitu:<sup>1</sup>

<sup>1</sup>Mustafa Abu Daif Ahmad, *Dirasat fi Tarikh al-'Arab*, Mu'assasah Shabab al-Jami'ah Iskandariyah, 1983, h. 69-72.

- i. Golongan hamba abdi. Kebanyakan mereka dibawa dari Afrika. Ada juga hamba-hamba putih yang dibawa dari Iraq dan Sham.<sup>2</sup>
- ii. Golongan atasan dan kaya. Golongan ini terdiri daripada orang yang berketurunan mulia yang mempunyai kedudukan di dalam masyarakat. Mereka juga terdiri daripada keluarga diraja di bahagian utara dan selatan Semenanjung Tanah Arab. Mereka menguasai kaum mereka dan memiliki tanah yang luas. Mereka juga terdiri dari ahli perniagaan yang memiliki wang dan harta benda. Golongan ini hidup di dalam kemewahan.
- iii. Golongan miskin. Golongan ini tidak memiliki apa-apa. Mereka bekerja keras membanting tulang untuk kepentingan orang atasan dengan sedikit upah. Bilangan mereka lebih ramai daripada bilangan orang yang kaya, terutamanya yang tinggal di padang-padang pasir.
- iv. Golongan ahli agama. Golongan ini mendapat tempat yang paling baik di kalangan masyarakat, kerana keistimewaan mereka yang dianggap sebagai penyambung lidah tuhan-tuhan mereka di bumi ini. Di tangan mereka ada kuasa memerintah, menyuruh dan menegah, yang mereka mendakwa menerima dari tuhan-tuhan. Mereka memiliki harta yang banyak. Segala perkara, selalunya diselaraskan dengan kehendak pemerintah.

Dari sudut lain pula, Jawad 'Ali membahagikannya kepada dua golongan, iaitu:<sup>3</sup>

- i. Golongan yang telah bertamadun. Golongan ini terdiri daripada orang yang tinggal di bandar-bandar dan di kampung-kampung. Pekerjaan mereka bercucuk tanam, memelihara binatang dan berniaga.
- ii. Golongan Badwi. Golongan ini terdiri daripada orang Arab yang tinggal di padang-padang pasir. Mereka bergantung kepada binatang-binatang pemeliharaan. Mereka berpindah randah dari satu tempat ke satu tempat mencari kawasan rumput dan air.

## 2. Budaya Adat Resam

Mengikut Shalabi, dari sudut budaya adat resam dan ikutan, tidak terdapat perbezaan yang jauh antara orang Badwi dengan orang yang dikira telah bertamadun yang tinggal di bandar-bandar dan di kampung-kampung. Ini kerana

<sup>2</sup>Yang dimaksudkan dengan Sham ialah Syria sekarang keseluruhannya. Palestin dan Jordan juga di antara kawasan yang termasuk ke dalam Sham masa jahiliah dahulu. Butras Harfush, *Al-Munjid fi al-'Ilam*, Dar el-Mashreq, Beirut 1976, h. 382.

<sup>3</sup>Dr. Jawad 'Ali, *Al Mufassal fi Tarikh al-'Arab qabl al-Islam*, Dar al-'Ilm lil-Malayin Beirut/Maktabah al-Nahdah Baghdad, 1968, jil. 4, h. 271.

adanya kesatuan unsur Arab di kalangan seluruh orang Arab dan hubungan antara orang Badwi dengan orang bandar dan kampung sepanjang masa. Di samping itu, ia juga disebabkan oleh tersebarnya di sana sini adat-adat ikutan yang sama. Keadaan ini berlainan dengan sudut siasah dan ekonomi yang di antara kedua-dua golongan ini ada perbezaan yang jauh.<sup>4</sup>

Berdasarkan keterangan-keterangan yang disebutkan itu dapat disimpulkan bahawa masalah kelas di dalam susun lapis masyarakat Arab jahiliah amat ketara. Susunan tersebut antara orang atasan yang terdiri daripada golongan pimpinan, orang kaya, yang berketurunan mulia dan golongan agama dan antara orang bawahan yang terdiri daripada golongan miskin, hamba abdi dan yang tidak tentu keturunannya. Namun, jika dilihat dari sudut kearaban, tidak terdapat perbezaan yang banyak di kalangan orang Arab jahiliah.

### **3. Kehidupan Perekonomian**

Dari sudut dasar ekonomi, perbezaan di antara golongan yang bertamadun dengan golongan Badwi adalah jelas. Orang Arab di bandar mengamalkan dasar ekonomi bebas, iaitu yang lebih terkenal dengan dasar kapitalis.

Dengan itu, saudagar-saudagar yang kaya raya dan pemilik-pemilik modal hidup dengan serba kemewahan, di celah-celah golongan miskin yang melarat. Keadaan ini berlaku di bandar-bandar seperti Mekah, Yathrib, di bandar-bandar di utara Semenanjung Tanah Arab dan di bandar-bandar di selatan Semenanjung Tanah Arab yang penghuninya hidup berkelas-kelas, terutamanya golongan yang terpengaruh dengan kehidupan orang Rom dan Farsi.<sup>5</sup>

Kalau dikaji kedudukan orang Badwi pula, maka didapati kehidupan mereka adalah kasar. Mereka makan daging, meminum susu dan memakai bulu-bulu binatang. Mereka bekerja bersama. Kekayaan kabilah menjadi milik kabilah. Anggota kabilah ada hak bersama untuk mengambil faedah dengan kadar hajat mereka. Jadi, khemah yang menjadi tempat tinggal dan segala perhiasannya menjadi milik perseorangan. Sedangkan air, padang ternakan dan bumi untuk tanaman gandum dan sebagainnya menjadi milik bersama anggota kabilah. Begitulah juga rampasan perang dibahagi-bahagikan bersama.<sup>6</sup>

Mengikut Ahmad Amin, ada golongan Badwi yang mencari makan dengan cara merampus dan menyamun. Mereka menyerang kabilah-kabilah lain dan merampus unta-unta, orang perempuan dan anak-anak. Untuk perlindungan diri

<sup>4</sup>Shalabi. *Mawsu'ah al-Tarikh al-Islami wa al-Hadarah al-Islamiyah (I)*, Kaherah, 1983/1984, h. 149.

<sup>5</sup>Ibid, h. 145-147.

<sup>6</sup>Ibid. h. 130-132.

daripada perbuatan-perbuatan tersebut, kabilah-kabilah kecil biasanya membuat ikatan dengan kabilah yang besar.<sup>7</sup>

Masyarakat jahiliah mengamalkan riba. Amalan riba yang terdapat di dalam jual beli dan pinjam meminjam menjadi-jadi di kalangan masyarakat jahiliah. Di dalam urusan riba, tidak ada tolak ansur dan tidak ada kasihan. Ibn Ja'far Muhammad Ibn Jarir al-Tabari menyebut gambaran riba yang berlaku pada masa jahiliah. Kalau seseorang berhutang dan setelah cukup tempoh bayar, tiba-tiba dia tidak dapat membayarnya, maka dia meminta tangguh dengan bayaran sekali ganda. Jika dia juga tidak dapat membayarnya pada masa tangguhan itu, dimintanya tangguh lagi dengan sekali ganda lagi. Begitulah seterusnya.<sup>8</sup>

Keterangan-keterangan tersebut jelas menunjukkan bahawa sistem ekonomi bebas di bandar-bandar di Semenanjung Tanah Arab melahirkan dua golongan yang amat jauh jarak antara kedua-duanya, iaitu golongan kaya dan golongan miskin. Sistem seperti ini akan berlaku penindasan terhadap golongan miskin dan lemah. Manakala sistem ekonomi yang berlaku di kalangan orang Badwi tidak demikian. Dengan itu, jurang pemisahan di antara mereka tidak begitu jauh.

#### 4. Hubungan Anggota Masyarakat

Dari segi ikatan masyarakat, hubungan antara anggota kabilah amat rapat. Ahmad Amin menjelaskan bahawa setiap anggota kabilah bertanggungjawab atas apa yang dilakukan oleh setiap anggotanya. Mereka akan menolong anggota kabilah mereka, sama ada dizalim atau menzalim. Sekiranya kabilah tidak mahu bertanggungjawab atas sesuatu perbuatan seseorang anggotanya, orang itu akan pergi kepada kabilah lain dan mengaku taat setia kepada kabilah itu.<sup>9</sup>

Sikap yang demikian mencetuskan perbalahan dan peperangan yang tidak henti-henti, sehingga ia menjadi perkara biasa.

Shawqi Daif menyebut bahawa antara ciri utama orang jahiliah ialah hidup di dalam peperangan yang berterusan. Perang seolah-olah menjadi satu lumrah hidup bagi mereka. Slogan mereka ialah darah mesti dibalas dengan darah. Ini bererti bahawa mereka tunduk kepada satu peraturan, iaitu menuntut bela. Menuntut bela merupakan peraturan mereka yang suci dan dihormati.<sup>10</sup>

<sup>7</sup>Ahmad Amin, *Fajr al-Islam*, Maktabah al-Nahdah al-Misriyah, Kaherah, 1975, h. 9.

<sup>8</sup>Ibn Ja'far Muhammad Ibn Jarir al-Tabari (m. 310 H. = 923 M.), *Jami' al-Bayan fi Tafsir al-Qur'an*, Dar al-Ma'rifah, Beirut, 1980, jil. 4, h. 59.

<sup>9</sup>Ahmad Amin, *op.cit.*, h. 10.

<sup>10</sup>Shawqi Daif, *Al-'Asr al-Jahili*, Dar al-Ma'rif bi Misr, Kaherah, t.t. h. 62.

‘Abd al-‘Aziz Salim pula menjelaskan bahawa suka kepada peperangan dan pembunuhan tertanam di jiwa orang Arab jahiliah. Dengan adanya perasaan tersebut telah membawa kepada penguasaan dengan kekerasan dan perseteruan. Cara tersebut menjadi satu jalan untuk sampai kepada hak dan kekuasaan. Dengan yang demikian, kematian di medan perang merupakan satu kematian yang mulia bagi mereka.<sup>11</sup>

## 5. Nilai Wanita

Berhubung dengan jantina, pada dasarnya, orang Arab jahiliah lebih suka kepada lelaki, kerana keperluan pada masa itu.

Mengikut ‘Abd al-‘Aziz Salim, lelaki diperlukan untuk memburu, berperang dan menjaga keturunan. Sedangkan anak perempuan tidak begitu. Dengan itu anak perempuan dibenci. Kebencian kebanyakannya orang jahiliah kepada anak perempuan ada yang jauh melampau, sehingga sanggup menanamnya hidup-hidup. Namun, ada yang sukakan anak perempuan. Golongan ini melayan dan menjaga anak-anak perempuan mereka dengan baik.<sup>12</sup>

Mengikut Shawqi Daif, wanita pada masa jahiliah, secara kasarnya terbahagi kepada dua kumpulan. Pertama, golongan hamba abdi dan kedua, golongan yang bukan hamba. Golongan hamba abdi lebih ramai. Ada di antara mereka yang ditempatkan di kedai-kedai arak, ada yang berkhidmat kepada wanita-wanita atasan (yang berkedudukan) dan ada yang menjaga ternakan. Manakala yang bukan hamba pula bekerja di rumah, kecuali kalau dia orang atasan, dia menggunakan orang lain berkhidmat kepadanya.<sup>13</sup>

Dari kenyataan-kenyataan tersebut dapat difahami bahawa wanita jahiliah terbahagi kepada dua golongan, iaitu ada golongan yang diberikan nilai yang baik dan tinggi dan ada pula golongan yang diberikan nilai yang buruk dan rendah.

Golongan wanita yang diberikan kedudukan yang baik ialah wanita-wanita keluarga orang mulia dan berkedudukan di dalam masyarakat. Wanita dari golongan ini boleh memilih suami dan meninggalkan suami mereka, jika si suami tidak elok keadaan dengan mereka. Mereka boleh memiliki harta dan menguruskan harta mereka, sebagaimana yang mereka kehendaki. Mereka ada nilai bagi lelaki, di samping memiliki kebebasan yang banyak.<sup>14</sup>

<sup>11</sup>Dr. al-Sayyid ‘Abd al-‘Aziz Salim, *Tarikh al-‘Arab qabl al-Islam (1)*, Mu’assasah Shabab al-Jami‘ah, al-Iskandariyah t.t. h. 364.

<sup>12</sup>‘Abd al-‘Aziz Salim, *op.cit.*, h. 395-397.

<sup>13</sup>Shawqi Daif, *op.cit.*, h. 72.

<sup>14</sup>*Ibid.*, h. 72-75.

Golongan wanita yang tidak diberikan nilai yang sepatutnya kepada mereka terdiri dari hamba abdi, wanita-wanita dari keluarga yang miskin dan wanita-wanita dari ibu bapa yang keras kepala dan degil. Anak-anak perempuan yang ditanam hidup-hidup adalah dari golongan ini. Ibu bapa takut bahawa mereka akan menjadi miskin atau anak perempuan mereka akan menjadi tawanan perang, kalaularan anak itu dibiarkan membesar.<sup>15</sup>

Namun, mengikut Shalabi, menanam anak perempuan hidup-hidup, yang pernah dilakukan oleh orang Arab jahiliah kerana takut malu atau takut menjadi tawanan perang, tidaklah tersebar dengan meluasnya di kalangan mereka. Perbuatan tersebut dilakukan oleh sesetengah kabilah sahaja.<sup>16</sup>

Dari keterangan-keterangan tersebut jelas menunjukkan bahawa kedudukan wanita semasa jahiliah yang diperlakukan seperti benda barang, binatang dan sentiasa ditindas adalah wanita dari kumpulan kedua, iaitu dari golongan yang lemah. Perbuatan seperti itu tidak terkena ke atas golongan yang pertama, iaitu golongan yang mulia. Di samping itu, perbuatan menanam anak-anak perempuan hidup-hidup yang dilakukan oleh sebilangan kecil orang Arab jahiliah didorong oleh perasaan takut malu, takut miskin dan takut dijadikan tawanan perang apakala anak-anak itu besar nanti.

## 6. Amalan-Amalan Buruk Yang Dibanggakan

Selain daripada sifat-sifat yang telah disentuh, ada tiga amalan buruk yang menjadi kebanggaan orang lelaki pada masa jahiliah. Amalan-amalan tersebut ialah minum arak, berzina (perempuan) dan berjudi.

Mengikut Jawad 'Ali bahawa arak yang dikira bermutu datang dari luar Semenanjung Tanah Arab. Kebanyakan pedagang arak adalah orang Yahudi dan Nasrani. Mereka memperdagangkan arak dari Sham, Hirah, Iraq dan lain-lain. Arak dipasarkan sehingga di kampung-kampung. Ia terdapat di segenap tempat, terutamanya di jalan-jalan yang terdapat tempat-tempat yang disediakan bagi orang musafir berhenti rehat. Ramai orang jahiliah menjadi ketagih arak sehingga ramai yang mati kerananya.<sup>17</sup>

Zina satu amalan yang menjadi-jadi dengan meluasnya di kalangan masyarakat jahiliah. Perbuatan zina bukan sekadar untuk melepaskan nafsu syahwat, tetapi merupakan satu kebanggaan kepada lelaki. Dengan adanya

<sup>15</sup> *Ibid.* h. 75.

<sup>16</sup> Shalabi, *op.cit.*, h. 177.

<sup>17</sup> Jawad 'Ali, *op.cit.* jil. 4, h. 665 dan 667 dan Shawqi Daif, *op.cit.* h. 70.

kebanggaan di sebalik zina dan perempuan, maka berkembanglah perniagaan pelacuran dan sarang-sarang perempuan lacur.<sup>18</sup>

Judi diamalkan dengan berleluasa di kalangan masyarakat jahiliah. Ia juga dianggap satu kebanggaan. Dengan itu, orang yang tidak mengambil bahagian di dalam perjudian dipandang sebagai pengecut.<sup>19</sup>

Dari keterangan-keterangan tersebut dapat difahamkan bahawa keruntuhannya moral di kalangan orang Arab jahiliah sangat teruk. Perbuatan yang keji dan merusakkan kehidupan mereka dianggap sebagai satu kebanggaan.

## 7. Sifat-sifat Baik

Di samping sifat-sifat buruk di atas masih terdapat beberapa sifat baik yang diamalkan secara menonjol di kalangan mereka. Sifat-sifat tersebut ialah:

- i. Murah. Walaupun orang Arab jahiliah suka berkelahi dan berperang, namun ketika aman mereka mulia dan murah. Kemurahan ini dapat dilihat di dalam layanan baik mereka terhadap tetamu-tetamu, janda, anak yatim dan orang yang memerlukan.<sup>20</sup> Shawqi Daif menambah bahawa sifat mulia lebih menonjol di kalangan orang Badwi. Kemuliaan yang ada pada mereka adalah jelas, kerana mereka menghormati orang fakir, memuliakan tetamu dan menyalaikan api di bukit-bukit supaya dapat memberikan petunjuk kepada orang sesat. Anjing-anjing mereka tidak menyalaik ketika kedatangan tetamu, kerana sudah biasa dengan tetamu-tetamu yang sentiasa datang.<sup>21</sup>
- ii. Berani. Dengan adanya sifat berani, mereka tidak takut kepada mati dan ia kadang kala menjadi melampau. Orang Badwi lebih berani berbanding dengan orang bandar. Ini disebabkan oleh kerana orang Badwi sentiasa terlatih dengan berjaga-jaga mempertahankan kabilah. Mereka sentiasa terdedah kepada bahaya-bahaya serangan dan pengkhianatan. Dengan itu mereka menjadi lebih berani.<sup>22</sup>

---

<sup>18</sup> Mohd Mokhtar Shafii, *Sebelum Dan Sesudah Wahyu*, Elman, Kuala Lumpur, 1988, h. 41.

<sup>19</sup> *Ibid.*

<sup>20</sup> Abd al-'Aziz Salim, *op.cit.* h. 389.

<sup>21</sup> Shawqi Daif, *op.cit.* h. 68.

<sup>22</sup> Abd al-'Aziz Salim, *op.cit.* h. 391.

- iii. Setia kepada janji. Sifat setia kepada janji masih dipegang oleh orang Arab jahiliah. Dengan itu, mungkir janji dan mengkhianati janji menjadi kebencian mereka.<sup>23</sup>

## KESIMPULAN

Walaupun masih terdapat unsur-unsur baik yang menjadi amalan masyarakat Arab jahiliah, tetapi sifat-sifat buruk amalan mereka terlalu banyak yang menyebabkan kemanusiaan mereka terjunam jatuh dengan teruknya. Wajarlah masyarakat seperti ini diselamatkan dengan ajaran al-Quran dan hadis dengan metod dakwah kedua-duanya yang tersendiri yang sesuai dengan masyarakat tersebut. Keruntuhan tersebut dapat dilihat pada:

1. Jurang lapisan masyarakat yang sangat ketara.
3. Dasar ekonomi yang memberi peluang penindasan terhadap golongan miskin dan lemah seluas-luasnya.
4. Taraf wanita golongan bawahan dinilai terlalu rendah, serendah barang murah yang boleh dibuat apa sahaja.
5. Arak, zina (perempuan) dan judi menjadi amalan kebanggaan di kalangan masyarakat, walaupun bahaya kepada masyarakat terlalu besar dan sangat jelas.

---

<sup>23</sup>*Ibid.* h. 393.